

PHM - Tolys Bible Shahlar
65001 - Unicode (UTF-8)
CAP Information: checked/corrected 2009 HAB

FİLİMON

Pauli bə Filimoni Nomə

Filimon

PAULİ BƏ FİLİMONİ NOMƏ

VƏSƏ

Filimon çe Kolosse şəhri imoniyə icmo nom-sandinə uzvbe. Çəy Onisim nomədə qıləy ğulış hestbe. Im ğul ıstə soybiku vitəbe, de Pauli tanış bıəbe. Bə vaxti Paul zindonədəbe. Onisimi de Pauli vositə bə Məsihi imon vardəşbe. Paul ıstə nomədə Filimoniku əjo kardeydə ki, əv deştə ğuli aştı bıbu, çumçiko Pauli oqordınışe əv bəçəy soybi. Paul bə Filimoni məslohat doydə ki, Onisimi bıbaşşı, çumçiko əv həni qıləy vitə ğul ni, bə Məsihi imon vardə çəy qıləy imoniyə boəy.

Kitobi məzmun:

- 1:1-3 Səlonon
- 1:4-7 Şukur iyən dıvo
- 1:8-22 Pauli Onisimiro kardə xahiş
- 1:23-25 Vido kardey

1

¹ Məsih İsa roədə dustəğ kardə bıə az Pauliku iyən imoniyə boə Timoteyku bə azizə əməqdəş Filimoni, ²* çəmə imoniyə hovə bə Afiyə, çəmə həmkə bə Arxipi iyən ıstı kədə qırdə bıə imoniyon icmo səlom bıbu! ³ Çəmə Pıə Xıdoku iyən Rəbb İsa Məsihiku bəşmə lutf iyən sulh bıbu!

Şukur iyən dıvo

⁴ Az ıstə kardə dıvonədə tını bə yod vardeydəm hejo bə Xıdo şukur kardeydəm. ⁵ Çumçiko ıstı bə Rəbb İsa bıə imoni iyən bə Xıdo xəlği həmməy bıə mehıbbəti barədə məseydəm. ⁶ Az dıvo kardeydəm ki, çəmə umumiyyə imon jıqo fəol bıbu ki, de Məsihi vositə boəmə foydəyn bıəyon həmməyəvo sərəsəmon. ⁷ Çımı imoniyə boə, ıstı mehıbbət bomı yolə şoy-şoy iyən dılvandı səvon be. Xıdo xəlği dıliyən ıstı hımhımbədə ovc kardışe.

Pauli Onisimiro kardə xahiş

*1:2 Kol.4:17

⁸ Bı səbəb çımı bənə Məsihi həvari səlohiyə rəseydə ki, ıştıku ıştə vəzifə bə vıra rosniyə tələb bıkəm, ⁹ əmma bə mehıbbəti xoto esət Məsih İsa roədə Xıdo daynə iyən məhbus bıə az Paul bəti lovə kardeydəm. ¹⁰ *Çımı dustəğəti vaxtədə bə imon vardə ruhani zoə bo Onisimi tıku qıləy əjo hestıme. ¹¹ Vaxt hestbe çəy bəti hiç foydəş nıbe, əmma esət həm bəti, həmən bəmi vey foydəş rəseydə. ¹² Az əy, yəni ıştə con-ciqəri ıştı tono bə dumo oqordıneydəm. ¹³ Həğiğətən vey piyeydəmbe, əy ıştə tono oqətım, bıdə ıştı əvəzi Şoyə Xəbə roədə zindonədə bıə mıddətədə bəmi koməqəti bıkə. ¹⁴ Əmma nıpiyəme ıştı rizo nıbə hiç qıləy ko karde. Piyəme ki, ıştı kardə çoki məcburi ne, deştəxoşi bıbu.

¹⁵ Ğasbu Onisimi ıştıku kamişə mıddət esiyəy bə səbəb be ki, tı əy daimən ğəbul bıkəy ¹⁶ bənə ğuli ne, ğulisə baş, azizə boə ğəzinə. Əv xısusən bomı vey azize. Əmma həm bənə insoni, həmən bə Rəbbi imon vardə boə ğəzinə botı həniyən vey piyəynə boəy.

¹⁷ Esət ıştəni demı həmro hisob kardeydəşbu, mını ğəbul karde ğəzinə əyən ğəbul bıkə. ¹⁸ Ehanə əy bəti konsə zərər jəşe, yaan ğarzxoye, əvoni bəçımı hisob bıvıvışt. ¹⁹ Az Paul bəti deştə dasti nıvışteydəm ki, az ıştən çəvon əvəzi bədom. Piyeydəmni bəti bıvotım ki, tı bəştə ıştə jimoniro bəmi ğarzxoş. ²⁰ Bəle, ha boə, bə Rəbbi xoto ıştı bəmi qıləy foydə bırası. Qıləy Məsihiyə boə ğəzinə çımı dıl ovc bıkə.

²¹ Az xatırcəmim ki, bəçımı sıxani quş bədoş, əve ımı bəti nıvışteydəm. Zıneydəm ki, tı çımı piyəyonsə ziyodəy bəkardeş. ²² Həmçinin, bomı qıləy ğonəğə otağ hozı bıkə. Umudəvom ki, deşmə dıvon vositə az şımə tonu oqordıniyə bəbem.

Vıdo kardey

²³ Bəti səlom vığandeydən, bə Məsih İsa imon vardə, demı ivirədə zindonədə bıə Epafre, ²⁴ *çımı həmkon Mark, Aristarx, Dima, Lukə.

²⁵ Rəbb İsa Məsihi lutf deşmə bıbu!

* **1:10** Kol.4:9

* **1:24** Həv.12:12,25; 15:37-39; 19:29; 27:2; Kol.4:10,14; 2Tim.4:10-11